

16/10/2003

Kenali PM melalui Seribu Wajah Dr M

Tamrin Anuar

PAMERAN Seribu Wajah Dr Mahathir: Penghargaan Untuk Seorang Negarawan di Balai Seni Lukis Negara, wajar dikunjungi, khususnya generasi muda kerana mereka boleh melihat, menilai dan menghargai jasa kepimpinannya kepada kemajuan negara.

Pameran rakaman 1031 gambar eksklusif Datuk Seri Dr Mahathir Mohamad yang dipamerkan sejak 6 Oktober lalu menjadi tumpuan dan menarik minat rakyat dari seluruh negara bagi menghargai jasanya sepanjang 22 tahun sebagai Perdana Menteri.

Pameran dua bulan itu bukan saja menarik perhatian ramai untuk mengetahui peranan dan tugas Dr Mahathir, malah dijadikan saluran mendekati pemimpin itu dengan orang ramai, khususnya pelajar sekolah.

Pengunjung berpendapat pameran itu membolehkan mereka mengenali Dr Mahathir dan bersama-sama menghargai jasa dan sumbangan beliau sejak menerajui negara sebelum bersara 31 Oktober ini.

Pelajar Sekolah Menengah Kebangsaan Puteri Titiwangsa, Kuala Lumpur, Siti Balqis Helmi, berkata, pameran itu merakamkan Datuk Seri Dr Mahathir sebagai seorang negarawan, pemimpin serta insan biasa yang dikenali bukan saja di dalam, malah di luar negara.

Siti Balqis berkata, Datuk Seri Dr Mahathir berhak mendapat pengiktirafan dan penghargaan seperti ini daripada rakyat.

"Sebagai generasi muda seperti saya bangga mendapat seorang pemimpin dan negarawan yang begitu berwibawa seperti beliau," katanya.

Tambah Siti Balqis, tempoh dua bulan pameran itu diadakan memberi peluang generasi muda sepertinya untuk mengenali Perdana Menteri dengan lebih dekat lagi.

Bagi Nurul Syafrein Azman, berkata, kunjungannya ke pameran itu mencetuskan semangat dalam diri mengenai kepemimpinan Dr Mahathir yang berjaya memimpin negara.

"Walaupun tidak dapat berjumpa Datuk Seri Dr Mahathir secara dekat, kami bangga sekurang-kurangnya berpeluang melihat koleksi wajahnya yang dirakamkan selama 22 tahun memimpin negara.

"Pelajar diberi sedikit penerangan mengenai gambar yang dipamerkan bagi memudahkan mereka memahami situasi yang digambarkan itu," katanya.

Pameran yang berakhir 6 Disember ini adalah anjuran bersama Kementerian Penerangan, Pertubuhan Berita Nasional Malaysia (Bernama) dan media Malaysia sebagai penghormatan kepada Perdana Menteri keempat itu.

Rakannya, Roszalinna Jalil, berkata pameran itu mendedahkannya dengan perwatakan kepemimpinan Dr Mahathir yang banyak membantu percambahan pemikiran generasi muda.

Katanya, kejayaan dan kecemerlangan yang ditunjukkan Perdana Menteri bukan saja mengharuskan nama negara di peringkat antarabangsa tetapi menjadi idea kepada generasi muda untuk maju ke hadapan.

"Gagasannya mengenai wawasan 2020 menjadikan rakyat lebih dinamik dan berlumba-lumba maju ke hadapan bagi menyahut cabaran seperti yang dicituskannya," katanya.